

**DIE LIEFDE VIR ELOHIM -  
DIE WEG NA MISTIEKE EENHEID  
51. OEFENING**

**'n Oproep om hulp wat telepaties uitgestuur word, sal deur die gemeenskap ontvang word, ons help mekaar - om te luister lei jou gevoelens op - ware liefde - seksualiteit is 'n skeppende krag en is 'n gawe van ELOHIM - hel en vagevuur is toestande - in jou oordeel vibreer jy met jou eie resonansie - sodra ons die resonansie in onself oplos, sal dit ook in ons naaste oplos - meditasie: Siel/mens - plaas jou bewussyn in jou siel**

Voorwaar, MY GEES waai deur julle, want julle het die verantwoordelikheid herken wat elkeen van julle dra om mekaar in die gemeenskap te help, sowel as om mekaar vanuit die verskillende oogpunte te ondersteun. Slegs op hierdie wyse kan EK JAHSHUA DIE GESALFDE elkeen van julle ten volle met MY Liefde aangryp en sodoende - deur julle - aan julle gesprekke deelneem.

Herken dat wat in so 'n gemeenskap groei, 'n gees van innerlike verbintenis is. Selfs wanneer julle eendag alleen sal stap, buite die gemeenskap, maar saam met MY, sal julle steeds in julle innerlike wese verbonde wees en sal steeds ondersteuning en hulp vir mekaar beteken. Julle beoefen julle gevoelens sowel as julle vermoë om julle naaste telepaties waar te neem. Slegs een uitgestuurde gedagte om hulp van julle naaste na die kring, en julle sal op daardie oomblik verbind, en julle sal daar wees vir mekaar.

Julle ook, MY geliefde dissipels, wat nie in hierdie kring is nie, maar wat hierdie weg in ander gemeenskappe bewandel, of wat alreeds alleen hierdie weg gaan, dink daaraan dat ook julle jul gevoelens oefen deur van vêr af deel te neem, soos wat julle toewyding aan julle naaste hierdeur vervolmaak word. Sit dus net agteroor en luister! Kyk in die hart van jou naaste en jy sal hom of haar verstaan. Vanuit sulke begrip groei liefde, 'n liefde wat nie met julle menslike liefde vergelyk kan word nie; want hierdie liefde word deur MY GEES bestraal. EK JAHSHUA DIE GESALFDE verstaan alle mense en siele, en julle sal ook tot hierdie soort begrip kom.

Weereens sal EK die voorbeeld uit die skrif gebruik wat handel oor 'die owerspeelster.' Hoe vinnig was almal nie gereed om die eerste klip op te tel nie. Maar toe EK hulle toespreek met: 'Sal die een onder julle wat sonder sonde is, die eerste klip gooi', het diegene wat alreeds hulle klippe in hul hand gehad het, stil weggestap, en EK was alleen met die vrou en het gesê: 'Probeer hard!' - "Verander jou lewe en verlaat jou lewe van sonde!" Sy het haar hoof neergebuig. MY liefde het haar bestraal en haar ophef na die lig sfeer van geestelike liefde. Op daardie oomblik het sy verstaan wat die gebeurtenis haar wou wys, naamlik ware liefde, nie julle menslike liefde nie, wat deur

middel van ongebreidelde seksualiteit tot uitdrukking kom. Hierop wil EK ook kortliks 'n paar woorde sê.

Herken dat die seksdrang ook 'n gawe van ELOHIM is aan Sy aardse kinders en dat hierdie krag, wat julle in jul innerlike dra, homself stap vir stap sal transformeer van die oernatuur, wat julle nog steeds op dieselfde vlak as die dierewêreld plaas, na 'n hoër seksualiteit. Want dit sluit aan by die GEES van Liefde, met MY, JAHSHUA DIE GESALFDE, en dit sluit dus die gade in hierdie hoër liefdesvibrasie in, ongeag op watter geestelike vlak julle julleself mag bevind.

Dan sal julle standpunt ook verander, sowel as julle veroordeling van vroue, soos in die voorbeeld van die 'owerspeelster'. Julle sal verander en nie meer oordeel nie. In stede daarvan sal julle in daardie vroue herken dat hulle julle op 'n fisiese vlak bedien deur hulself aan julle oor gee. EK ken julle beswaar: "Ja, vir geld." EK sê vir julle: "Kyk agter die masker van geld verdienste. Kyk na elke vrou, kyk in haar hart in en jy sal in hulle ook die soeke na ware liefde herken."

Moenie verdoem en veroordeel nie, sodat julle ook nie in julle oer-seksualiteit geoordeel word nie, deur julleself geoordeel, want julle verdoem en veroordeel julleself met dieselfde maat waarmee julle ander meet.

En nou sal EK verwys na 'n vroeëre gesprek in hierdie sirkel: Hel is 'n toestand, vagevuur is 'n toestand. Net soos wat julle jul medemens meet, sal julle op dieselfde manier gemeet word in die uur van waarheid, in die uur van herkenning, wanneer julle die oorgang na die volgende sfeer sal maak. Indien julle nog altyd probeer het om julle broers en susters te verstaan, ongeag hoe hulle op aardse vlak geval het, volgens hoe julle hulle beskou het - en EK beklemtoon beskou het -, sal julle strewe vrug dra. En in die loop van julle verhoogde bewussyn in die hier en nou saam met MY, JAHSHUA DIE GESALFDE, die Liefde, sal julle selde verdoem en veroordeel, want julle herken julleself en sal julle weet dat met elke oordeel jul eie vibrasie julle klankbord was.

Eers wanneer julle die pad loop wat julle reeds begin het - vol vreugde en sonder vrees - en wanneer julle in MY voetspore volg wat EK stap vir stap vir julle voorberei het, kan julle seker wees van die oorwinning. Dit is die oorwinning oor julle basiese self, oor julle ego. Hierdie oorwinning kan slegs behaal word deur erkenning, want sonder erkenning weet julle nie waar julle die byl in julleself moet begin neerlê nie. Julle verkry hierdie erkenning deur die voorgenoemde resonansie.

Alles wat in julle resoneer, alles wat nog emosies in julle kan oproep, is baie verbonde met julle deur vibrasie. Hierdie vibrasies van julle eie wese moet vrygestel word. Deur hulle in julleself vry te laat, is julle - en dit is die wonderbaarlike genade van Liefde -

terselfdertyd besig om die vibrasies in julle naaste vry te stel, met wie julle in ooreenstemming vibreer. Julle naaste is op julle pad geplaas deur die Wysheid, Liefde en Genade sowel as deur die VADER se heilige wette. Julle sal slegs daardie medemens teëkom met wie julle nog steeds verbind is, deur vibrasie, of dit nou in die positiewe, ligge vulde sfeer is, of selfs in die negatiewe en donker gebiede.

Die denke in terme van goed en kwaad sal op hierdie planeet voortduur, solank as wat julle die vibrasie van beide in julle binneste dra. As julle egter julle weg teruggevind het na die goue middel, na julle lig - wat julle in werklikheid is - dan sal die begrippe van goed en sleg, julle gepolariseerde denke, ophou en oplos. Wanneer julle in die lig sal staan, sal julle beseef dat daar niks anders as lig is nie. Dan rus julle in die hart van die VADER. Julle ware plek is daar, julle standpunt, terwyl al die ander slegs opvattinge is. Los hulle op en julle sal die gebeurtenisse van die val aktief omvorm na Lig en Liefde, na Vryheid, wat van die begin af aan julle gegee is.

MY geliefde dissipels, mag julle begin en probeer hard om julle bewussyn deur en deur te verander, sodat julle juis nie meer sal identifiseer met die straal wat julle uitgestuur het nie, maar eerder met julle ware oerwese. Slegs met die siel sal jy juis herken as Seun, as Dogter van die EWIGE HEILIGE VADER.

Wanneer julle jul standpunt verander, sal julle alle gebeure op hierdie planeet vanuit 'n verhoogde bewussyn aanskou. Dit is egter ook stappe van ontwikkeling, stappe wat deur tyd en ruimte lei. EK het dit voor julle uitgeloopt, en EK vra julle om dit te volg, want elkeen van julle moet sy of haar innerlike vryheid erken.

Julle is waarlik vrye seuns en dogters van die ALLERHOOGSTE, julle is nie gebonde aan materie nie, en ook nie gebonde aan enige sfeer nie. Julle sal weereens vryelik in die suiwer wese beweeg. EK sal julle na hierdie nuwe bewussyn lei. Wandel saam met MY - volgens julle vrye wil.

Beseef dat die siel haarself stewig verbind het met die 'mens' tydens julle geboorte. Alhoewel julle siel naby die ontwikkelende liggaam was, wat haar inkarnasie op hierdie vlak moes dien, maar eers met die eerste asemteug en met die eerste uitroep van die kind, het die siel die liggaam volledig binnegegaan. In die eerste jare van aardse lewe kon die siel steeds die liggaam verlaat, selfs gedurende die dag. Die kind het nog nie die woorde 'EK wil' gesê nie –[julle het die hoofstuk ontvang waar dit verduidelik word.] Met die eerste 'EK wil' was die siel egter gevange geneem [in die liggaam]. Al bestraal hierdie siel haar lewenskrag in die liggaam in, trek die 'mens' sy bewussyn terug van die siel en wend haarself meer en meer tot die fisiese liggaam.

Vervolgens herken die mens in sy of haar ego sy fisiese wese, identifiseer homself meer en meer met hierdie liggaam en verloor hy terselfdertyd die band met die

siel. Baie van julle het slegs bewus geraak van julle siel deur siektes of noodlot te ervaar, waardeur julle siel julle wil wys dat daar meer as die menslike liggaam moet wees en dat daar in hierdie liggaam 'n ander krag bestaan wat hierdie liggaam lewe gee. Wanneer hierdie krag onttrek, word die menslike kleed siek. Daarbenewens aanvaar die siel ook vryelik en bewustelik die houe van die noodlot, sodat die menslike kleed, wat nou slegs met die brein identifiseer, dan beseef dat daar iets anders moet wees as die liggaam met sy selle. Slegs deur hierdie denkfase word die verband met die siel hernu en van daar af pols die siel binne-in die 'mens' en herinner hom [die liggaam] aan alles waarvoor die siel aarde toe gekom het. Die siel herinner die mens - by wyse van gewaarwordings - dat die mens die siel moet dien en nie andersom nie.

Mag julle dus - weereens in ooreenstemming met julle vrye wil - julle bewussyn van die menslike liggaam losmaak en aan die siel teruggee. Gaan saam met MY in meditasie:

Jy moet regop sit, jou hande lossies in jou skoot geplaas en albei voete moet op die vloer wees. Die sitplek van jou siel is aan die agterkant bo-op jou kop. EK JAHSHUA DIE GESALFDE plaas MY hand saggies daaroor en MY krag pols daarin. Jy sal nou die bestraling van die siel aan die agterkop voel...

MY broer, MY suster van die lig, EK groet julle. Julle het vry gereis en steeds is julle so baie naby aan MY. Kom, laat ons julle aardse kleed saam bestraal, sodat die 'mens' die krag kan voel wat van julle af kom, die krag wat met MY verenig het, sodat alle selle van julle aardse liggaam deur hierdie krag aangeraak kan word, sodat julle selle in belyning kan kom met MY, en met ELOHIM, die EWIGE HEILIGE VADER, met Wie EK een is.

MY bestralingskrag verbind met joune, o siel, raak nou die middelpunt van Barmhartigheid, terwyl strale van die goddelike Barmhartigheid goud om die middelpunt aan die kroon van jou kop speel. Liefde vanuit die ewige hemele pols ook daar: Een GEES, een KRAG. Die hele kop area is gevul met hierdie krag van Liefde. Elke sel drink vanuit die oseaan van Liefde.

Die VADER bestraal die sentrum van geduld met Geduld. Ook jy, o siel, raak geduldig met jou menslike kleed. Geregtigheid, naby die hart, begin te pols. Met elke polsslug van jou menslike hart, voel jy, o siel, hoe hierdie menslike kledingstuk gereed raak om jou te dien. Selfs al het die mens die erns nie ten volle begryp nie, kyk geduldig na hierdie menslike kleed, o siel, en met dieselfde welwillendheid wat jy nou voel, want dit kom van die goedheid van die VADER.

Die Wysheid binne-in julle is onuitputlik. Die mens kan haar nie peil nie; tog is daar in die diepte van julle wese die bewussyn van die sewe maal sewe vlakke en die suiwer geestelike hemele. Alles is binne-in julle. Al voel julle siel gevange deur die intellektuele denke van die mens, sien, hierdie menslike kledingstuk is gereed om te put uit die goddelike Wysheid.

MY stroom vloei verder deur jou, o siel. Dit is MY lewe, MY liefde, MY Skepperkrag, en sy stroom na die bewussensentrum van die goddelike Wil. Kyk, o siel, hoe die mens binne die wil van die ALLER-VADER probeer optree, hoeveel die mens gewillig in MY voetspore volg. Weereens bestraal MY geduld jou. Jy herken hoe die mens ook sukkel met die vlak van Orde .... Nou, o siel, voel jy dat hierdie kleed voor jou buig, dat die mens gereed is om jou te dien. En jy, o mens, voel nou die vreugde in jou binneste, hoe kragtig stroom die lewe, die liefde, deur jou! As jy, o mens, een met die siel is, sal jy waarlik met ligvoetigheid deur die materie reis en oor al jou probleme kom wat jy hier en daar het.

O mensekind, kyk hoe die lewe diep in die sole van jou voet pols, en hoe kragtig stroom die Liefde na die aarde! Daar is slegs een eenheid en dit is die MOEDERLIKE eienskap wat verenig is met die VADERLIKE eienskap! Aarde is jou moeder; sy is een met die GEES van die VADER. Jy, o mens, is van die aarde, word deur haar gevoed, en jy ontvang alle bestraling van haar af en weet nie van al die dinge wat die aarde aan jou gee nie. Kyk, al die uitstraling wat deur jou moeder uitgegee word, is vol lig, tensy hierdie liggevolde uitstraling die duister straling tref wat nog in jou is, o mensekind, veroorsaak deur gebrekkige denke. Indien slegs liefde van julle af na MOEDER AARDE vloei, o mens, sal sy julle met alle mag dien.

Wees nou bewus, o mens, dat die siel op hierdie oomblik haar krag stap vir stap terugneem, sodat jy kan beseft dat jy nie lewe nie, want jy is maar aarde van hierdie aarde. Jy is materie, en die lewe in jou is GEES. Sodat jy, o mens, kan leer om jou bewussyn in die siel te plaas, sal laasgenoemde nou sy kragte onttrek. Net soveel lewenskragte sal in jou oorbly, o mens, sodat jy jousef kan onderhou.

Die siel trek die lewe, die krag van julle voete, van julle skene en van die knieë en dye. Hierdie liggaamsdele is swaar en roerloos. Die siel onttrek van die sentrum van Orde, van die sentrum van die Wil, van die sentrum van Wysheid, van Geregtheid, Geduld, Liefde en Genade. Die menslike liggaam raak heeltemal ontspanne en vorm 'n eenheid met die aarde.

Nou, o siel, jy wat in jou innerlike 'n broer is, 'n suster van die lig, kom steek jou hand uit na MY! Verlaat hierdie menslike kleed, vertrou jousef aan MY toe. Kom! ... Kyk om jou! Dowwerig sien jy MY in die lig. EK het self die hemelse prag verdof. Moenie bang wees vir die toestand van vryheid wat julle wese ervaar nie! Sien, EK wil met julle saamstap buite tyd en ruimte. EK JAHSUA DIE GESALFDE lei julle na die lig, waarvandaan julle gekom het. EK lei julle na aktiwiteite wat nie gebonde is aan die wette van hierdie aarde nie. EK lei julle na vryheid. Steek julle hand na MY uit! Julle beweeg vrylik rond. Daar is geen mure nie. Julle sien die dowwe lig Wie EK is, vir jou verdof, en jy sien in die wydtes in. Julle styg bo die Aarde uit, vry en

ongebonde; jy loop na die werklikheid.

Daar is duisternis op hierdie helfte van die aarde. Staan op en jy sal die sonlig sien! Kom, met hierdie eerste oefening moet julle jusef heeltemal oorgee aan die vryheid om die aardse sfeer te beskou. Moenie na die donker skaduwees kyk nie, maar sien hier en daar die lig en versterk dit. Laat MY Liefde, Wie ook aan julle behoort, deur julle vloei na al die lande wat uitgesprei is aan julle voete, na al julle broers en susters wat, net soos julle, hierdie planeet in die aardse kleed bewandel.

Omring hulle met die band van liefde vanuit die hemele! Vanuit julle oogpunt herken julle hoe hulle netso sukkel soos julle, soos alle siele, julle broers en susters. Julle sien hoe hulle hul met hul liggame identifiseer, wat niks anders is as materie nie, net soos wat julle met hulle identifiseer.

Begryplike liefde stroom deur julle. Hierdie liefde versprei deur seën - in MY Naam - na die mineraal-, plant- en diereryk en deur alle natuurwesens te seën. Julle sien hulle nou. Kyk mooi, dit is nie skaduwees nie. Kyk na die vreugde in hierdie verskillende uitdrukkings van die GEES! Weereens seën julle al julle broers en susters van hierdie aardse sfeer in MY Naam.

Kom nou terug, o siel, maar behou die bewussyn van jou ware wese, selfs wanneer jy weereens met jou aardse kleed verenig is! Hierdie bewussyn word oorgedra aan jou 'mens' wanneer jy, o siel, daaraan geboei voel.

Aanvaar hierdie kledingstuk en herken dit, en wees verheug dat jy in staat is om op hierdie aarde daarin te wandel! Jy sien nou die skaduwees, wat jy in jousef dra, maar jy sien ook die wonderlike taak, om MY, JAHSUA DIE GESALFDE te help, sodat daar vrede op Aarde kan wees en sodat EK alle dinge nuut kan maak. EK is in jou, o geliefde siel, in eenheid met die VADER, soos jy weet. Deur jou bewandel EK hierdie aarde. Daarom kan daar nie van vryheid afgewyk word nie. Jy is altyd vry, o siel!

Julle krag, die lewe, die volheid stroom weereens in julle menslike kleed in. Deur middel van die middelpunt van Barmhartigheid, stroom die lewe voort, na die middelpunt van Liefde, Geduld, Geregtheid, na Wysheid, Wil en uiteindelik goddelike Orde. Daar vertoef jy in die wete dat jy weer heeltemal verenig is met die mens. Die lewe pulseer weereens die hele pad tot by die voetsole en tot by julle vingerpunte.

Alhoewel julle steeds op hierdie vlak van Orde beweeg terwyl julle jul in die aardse kleed bevind, sien julle nietemin die lig, daardie EK-IS-DIE-LIG, wat ook binne in julle is, sowel as in julle almal in die hele wêreld van die Aarde, die lig wat deur hierdie Aarde deur julle wil gaan. MY liewe dissipels, kry julle bewussyn in lyn met julle siel!

Mag julle self hierdie **meditasie** daagliks in soortgelyke vorm beoefen, indien julle wil. Julle hoef nie by die presiese woorde te hou nie. Julle is vry om julle eie woorde te kies, en net so vrylik as wat julle bewussyn

deur julle siel in julle binneste ontvou.

Moenie toelaat dat hierdie meditasie meganies word nie, want deur dit te doen, sal julle weer inbreuk maak op julle innerlike vryheid! Hierdie meditasie word slegs as voorbeeld gegee. Volgens julle sielsgevoelens kan dit heel moontlik 'n ander weg gaan en dit behoort. Want hierdeur identifiseer julle julleself as MY ware dissipels; omdat julle nie meer op iemand of iets steun nie; omdat julle self 'n rots geword het. Julle is die rots waarop EK MY innerlike kerk, MY innerlike gemeen-

skap kan bou.

MY seën is ook in julle. MY krag vloei deur julle. Gaan voort op die pad van eenheid met MY, in 'n nuwe bewussyn, verhef tot 'n hoër vlak.

Amein.